



Kamis, 04 Nopember 2023

Ogen: Juna 2:1-10



Erlebuh I bas Kiniseran



Telu wari i bas beltek nurung, e ingan Juna rukur kerna perbahanen Tuhan man bana. E maka ituriken Juna kerina kai si nanamina kenca ia iambekken penumpang kapal e ku lawit. Galumbang si ergalun Namburi ia, gejakenna narus mate ia iabahan galumbang e. Gedap ia i bas lawit si mbages, lumut-lumut ngelilet takalna. Kebiaren si mbelin e iananamina. Akapna kin pe Tuhan ngukum ia seh mate. Lanai lit kesempatanna ngidah doni enda. Tapi, irintak Tuhan ia mulihi i bas ingan si mbages dengen gelap nari. Kai si inanamina e kerina erbahansa reh bagesna penandaina kuasa Tuhan si mbelin. E maka i bas pertonna ertoto iturikenna maka Tuhan nge si ngasup mulahi ia i bas doni kematen nari. Nina Juna ertoto: 'i bas kiniseranku nari ku lebu kam o Tuhan, janah ialoiNdu aku. I bas doni kematen si mbages nari nderkuh aku mindo penampat, e maka ibegikenndu aku. Arah pertoton e isaksiken Juna maka Dibata labo rasa lalap merawa. Idengkehkenna nge kalak si erlebuh i bas kiniseranna nari. I bas ingan si gelap dengen mbages nari pe ibegi Tuhan nge kalak si erlebuh man bana. Juna ersaksi arah pertonna maka i bas Tuhan anri kap rehna keselamatan.

Kesaksin Juna e jadi pelajaran man banta maka i janari pe kita ertoto ibegiken Tuhan. Labo terjeng igereja entah tupung kita perpulungen. I bas kelbung si gelap, si dem kebiaren ras kearun ate, i bas buena persoalen ras kiniseran, i ja nari pe ras i bas situasi si kuga pe si man alanken, idengkehkenNa adi kita erlebuh baNa. Biak Tuhan e la ndekah merawa, ras perkeleng. Bas ukumenNa e pe situhuna ban ateNa keleng. Ula tertaren-teren, lebulah Tuhan i bas kerina situasi si man alanken.

✎ Tuhan ngasup mereken serpang pulahi